

Sargento Kelly: Programa Formacion Social ta hopi bon pa comunidad

Grupo 9 a ricibi diploma for di Prome Minister Eman



CADA grupo di hoben cu participa den e programa Sociala Vormingstraject, un iniciativa di Gabinete Mike Eman den cooperacion cu Ministerio di Defensa di Reino Hulandes, ta pasa den diferente fase importante.

Fasenanan caminda cu e enfoque principal ta den disciplina, entrenamiento fisico y traha den team. Tin bes pa algun siman nan no por wak nan famia, otro periodo nan por bay cas fin di siman. E trainingnan, cu ta cay bou di responsabilidad di Arumil, ta duro y practicamente identico na loke cualkier 'marinier' ta haya su prome aña.

Na final di e fase duro aki, e hobennan cu finalisa e trayecto exitosamente, por sinti hopi orguyoso cu nan por sigui dilanti den nan bida cu e disciplina y etica di trabou cu nan a adkiri for di e programa aki. Na final, pa simbolisa nan exito, ta entrega nan, nan propio Baret y despues nan certificado. Esaki ta loke a tuma luga diabierna ultimo den presencia di Prome Minister Mike Eman y comandante Jan Ten Hove di Marinierskazerne.

Di Grupo 9 tabatin un hoben cu a resalta, y ta trata aki di Rodereck Hoevertsz di 24 aña, kende a scoge

pa drenta e programa despues di a pasa un temporada largo na cas.

"E ta un decision cu mi mes a tuma, pero cu apoyo di famia. El a resulta algo duro, mas duro cu mi a spera," Hoevertsz a expresa. Pero apesar di tur esaki, principalmente despues di e prome dia, el a dicidi di persevera. "Esaki tabata e prome paso, pero mi a dicidi di sigui."

Awo cu a finalisa e prome parti, Roderick Hoevertsz a keda hopi contento.

"Mi a bin aki pa ta un miho persona y nan a percura pa ta asina." Segun Hoevertsz, e experiencia tabata algo unico y ta un experiencia cu e por conta su yiunan den futuro.

E ta masha agradecido na henter ekipo militar cu a yuda nan, pero tambe e team di oficina di SVT, kendenan semper tabatin pasenshi y dedicacion pa scucha y yuda. Hoevertsz su experiencia den Formacion Social ta algo cu e lo consecha cualkier hoben.

"Bin proba bo mes aki den cu bo ta tof. Si bo pas'e, bo ta tof."

Durante henter e programa cu tin un duracion di un aña, e hobennan ta wordo guia den e parti emocional dor di e team di Jessie Ras,

consistiendo tambe di Lurenne Flanegien-Tromp y Nicole Godett. E hobennan, ta wordo guia pa e team di Sargento Maurits Kelly, instructor di deporte di Arumil. "Mi ta sintimi hopi orguyoso di por a mira progreso di e hobennan, orguyoso di a nifica algo pa e hobennan," Kelly, kende a pasa den 7 grupo caba, a expresa.

Kelly a recorda cu e parti disciplina tabata hopi mas pisa cu e ehercicionan fisico.

Pero ta percura pa guia e hobennan di tal forma cu ta wanta nan tur den e Programa.

Esaki ta wordo logra dor di hopi comunicacion directo cu e participante y famia.

Tambe ta importante pa e hobennan mira con Prome Minister Mike Eman ta acudi personalmente pa entrega nan diploma.

"E ta algo cu ta pone nan sinti hopi orguyoso, ricibi nan diploma di Prome Minister y cu Commandante di Marinierskazerne presente. No tur hende ta topa cu un Prome Minister of un Commandante", segun Kelly.

E programa Formacion Social ta hopi bon pa comunidad, Sargento Kelly a bisa, pasobra ta combina e aspecto di teoria y practica cu

otro. E hobennan ta haya chens pa destaca y demostra loke nan por.

Pa tur interesa den participa, por pasa busca formulario di inscripcion na Bestuurskantoor na Oranjestad of na edificio di MFA Noord. Hunto cu e formulario ta pidi pa entrega un copia di ID valido. Tambe por yama e numbernan 522-5353 of 592-6160 of manda un email na info.formacionsocial@gmail.com.

E proceso di inscripcion y registracion ta inclui e datonan di e hoben, un examen medico y un entrevista personal.

